



LA PATRIE DAL FRIUL

SFUEI MENSÎL INDIPENDENT

Direzion e Aministrazion - Udine - via del Cotonificio 129

Tassa pagata / Taxe perçue Udine Italy - mensile / mensil spedizion in abonament postâl Poste italiane s.p.a.



EDITORIÂL

O publichìn il test che il president de Clape di Culture Patrie dal Friul al à scrit pal libri "Il Friuli Modello 1976 - 2016" publicât dal Istitut Ladin Furlan "pre Checo Placerean".

La tiere e scjasse, a colin cjasis e monuments, ma a clopâ ai 6 di Mai al è ancje il concet stes di Stât e des sôs istituzions.

Intal 1976 il Friul al è un pont nevalgjic de strategjie militâr de NATO, anzit al è "il Pont". Di chi a varessin vût di passâ i cjaramâts dal Pat di Varsavie in câs di invasion. No dome: chi, a Davian, a son, ma ducj alore a disevin che no jere vere, lis testadis nucleârs, propit là che i bombardîrs americans a àn la lôr base.

✦✦ I Stâts Unîts no puedin permeti une "situazion di instabilitât fuarte" su chest teritori. Il comunisim al reste il nemî principâl, la URSS di Brežnev une menace reâl, i plans militârs de NATO a previodin ancjemò chel "soiâr di Gurize", la striche che dilunc di jê l'esercit talian al varès di resisti adiriture par cinc minûts, dant cussì il timp ai avions di bombardâ l'invasôr, ma ancje dut chel che i sta ator.

✦✦ Tra la riunion dal guvier de matine dai 7 di Mai, la prime nomine di Zamberletti e la successive, cul intervent diret di Moro e la sô decision di rimeti la ricostruzion ae Regjon, a passin pôcs dîs e no si pues pensâ che nol sedi stât un contat diret cui comants NATO e il guvier american par concuardâ une linie di azion che e tignîs cont dal confin orientâl.

✦✦ No je stade la classe dirigente furlane, in particolar la DC locâl, a otignî cheste responsabilitât, che invezit e je stade decideude, ma disarès ordenade, dal stes Moro.

SOLIDARIETÂT E IDENTITÂT: LA LEZION DAL 1976

Dree Valcic

Il president Comellialà acetât cheste cjame no cence pôre e esitancis: al bastarès visâsi la espression de sô muse par television o la tonalitât basse de sô vôs intai dîs subit dopo dal sisme. Intant che intai paîs dulà che si sgjavave tra lis rudinis, a tacavin za a viodisi lis primis scritis "Nol sarà un altri Belice" par segnâ une volontât clare di reazion, dai palaçs de Regjon a partivin dome apeî flevars ae solidarietât nazionâl. No savin se a forin analiscj de CIA a detâlis regulis, o se invezite fos stade propit la intelligenza politiche dal statist democristian a imponi une strategjie di decentrament di

podès e risorsis, che in graciis di chês si sarès provât a no ripeti il Belice, evitant cussì une potenziâl situazion esplosive.

✦✦ No savin nancje cuâi "dossier" che a rivarin su la taule di Moro des zonis taramotadis: dal sigûr i rapuarts dal SID a vevin segnalât i prins sintoms de malfidence de popolazion colpide bande lis promessis romanis, a vevin notât il rivâ di voluntaris e zovins di dute la Italie, cu lis jerarchiis che a saltavin tra i soldâts e i uffiçai impegnâts tra lis maseriis, lis primis riunions tra i cjâfs di famee che a configuravin il tornâ a nassi di chês

formis spontaniis di organizazion e vigilance autonome, cun picons e sclopis di cjace. E nancje dal Vatican a rivavin buinis gnovis in cont dai predis furlans, di timp cognossûts e bolâts tant che clericât cjaviestri e facil a impiâsi ai fûcs autonomiscj. Moro, duncje, al à sielt la strade plui juste par lui: chê di dismolâ il clime, prime che si discjadenâs il temporâl.

✦✦ Chel che o podin definî un colp di man, al veve bisugn però de aprovazion americane che no je mancjade cu la rivade in Friul dal vicepresident Rockefeller ai 13 di Mai, e cul anuzi dal stanziament

di vinceun miliarts a pro de ricostruzion de bande dal Congrès USA.

✦✦ La deleghe ae Regjon e fo aprovade, intune cui proviodiments urgjents, inte leç 336 dai 29 di Mai. Trê dîs prime a Glemone si jere tignude la prime assemblee dal coordinament des tendopolis, une riunion improibide de Prefeture, intant che si multiplicavin i ausvais pai voluntaris e lis provis di militarizâ la vite intes tendopolis: ducj ats parâts indaûr cun fuarce de popolazion.

✦✦ Il procès di responsabilitât coletive duncje al jere scomençât e si son dimostrâts dibant i ats seguitîs par blocâ il so disvilup che, gracie ancje a chê leç volude di Moro, al cjape dentri ancje sindics e aministradôrs intune ricostruzion gjestide e controlade dal bas.

✦✦ Ma par rivâ a chel risultât si ve di ribaltâ il concet stes de politiche e lis fuarcis in cjamp si son misurarin propit inte capacitât di adatâ metodis e strategjiis ae gnove situazion.

✦✦ Se, cemût che o vin viodût, il denominadôr comun dai doi partîts plui grancj, DC e PCI, al è chel di evità il ripeti dal câs Belice par resons diferentis, dut câs univoche e je la volontât di presentâ une (al va indenand a pagj. 2) ➤

PAI 80 AGNS DE "PATRIE" 1946-2026

US SPIETÏN AES INIZIATIVIS DAL GJORNÂL

A UDIN LUNIS AI 20 DI AVRÎL DAL 2026, AES 6 SORE SERE

SALON DI PALAÇ BELGRÂT, PLACE DAL PATRIARCJÂT 3

Presentazion dal libri "DI SCJAS IN SCJAS" di Agnul Floramo

GLOSSARI

Ricognossi il rasisim

Vê cussience de nestre condote e des reazioni che o vin

Lorena Durisotti

Cuant che o pensin al rasisim, nus vegnin tal cjâf soredut ofesis e resonaments di asse. Te realtât, il fenomen al è une vore complès. Si plate ancje intes peraulis che o doprin, in tantis batudis velenosis tai confronts di altris che a son te cundizion di incassâ cence reagjî.

◆ Stereotips e prejudizis a àn origjinis diferentis. A van de ignorance ae pôre di cualchidun che no si cognòs o di chei che a àn usancis diversis. Cun di plui, il sens di apartignince a un popul e a une comunitât al pues bastâ a no tirâ dentri dai confins (fisics o mentâi) un forest.

◆ Il rasisim al rive di un mût di pensâ, une interpretazion de esistence une vore antighe: la tindince a dividi il mont in "noaltris" e "chei altris". Une distinzion che e devente pericolose tal produci jerarchiis, dulà che certis personis a son calcoladis



inferiôrs, pôc affidabilis o mancun meritoriis di pussibilitâts nome par vie de lôr divignince, dal colôr di piel, de culture o de religion.

◆ Frasis che a somein no fâ mâl a di nissun, sul model di "i forescj a son brâfs tai lavôrs manuâi", ancje se a puedin someâ un compliment, a ridusin cetantis personis a une

cualitât ugnule come se altris rûi no fossin taiâts par lôr. Domandâ a cualchidun di famee foreste ma nassût e cressût in Italie "di dulà sêstu pardabon?" e je une altre espression di integrazion falade intune comunitât. Maraveâsi se un stranîr al fevele ben furlan o talian al mostre une spiete implicite su la

sô inferioritât culturâl.

◆ I prejudizis no son mai facii di ameti. Ideis e associazions mentâls, interiorizadis vie pal timp, a vegnin de formazion personâl, de comunicazion (imagjins, art, musiche, cines, pubblicitât, articui di gjornâi e vie indenant), de storie e dal contest sociâl dulà che si vîf. Fintremai chei che a son convints di vê une mentalitât vierte a puedin colâ in automatisims mentâi che no simpri a coincidin cui valôrs di avualance che a professin.

◆ Po dopo e je une dimension une vore largje dal probleme: il rasisim strutturâl. Al compet il funzionament des istituzions e lis oportunitâts sociâls. Fâs cont une persone cuntun non perceptît come forest che al cjape mancun rispuestis ae domande di lavôr rispjet a un candidât talian, ancje se il curriculum al è compagn. No dome une evenience isolade ma dispès un segn di un mecanisim discriminatori plui larc.

◆ Il prin pas che o podin fâ nol trate di dineâ la evidence, ma domandâsi cemût che cualchi difference culturâl e je considerade strambe o mancun civilizade. Invezit di incolpâ lis personis che za a son discriminadis, sfuarcinsi di scoltâ lis lôr esperiencis, di promovi leams basâts sul rispjet mutualistic, di corezi batudis discriminatoriis e di sruincâ gjeneralizacions e etichetis. Ricognossi il rasisim, sedi tes formis esplicitis che in chês invisibilis, nol divît la societât; al contrari, al è un dai struments plui impuartants par rindile inclusive pardabon. ■

ART TAL TAC

Inniò: la lenghe che e sune, la tiere che e respire

Moira Pezzetta



Inniò (dal furlan: di nissune bande) nol è dome un non. Al è une presince. Une presince che si sint tal aiar, tal flum, tal bosc. Une presince che e fâs respirâ la nestre lenghe, la nestre musiche, la nestre identitât. Inniò e je une associazion culturâl nassude cu la vison di meti la culture populâr e contemporanie in dialic cul teritori, par fâ tornâ a vivi i lûcs, par stimolâ la partecipazion e par dâ une vòs vierte a cui che al crôt che la lenghe

furlane e i siei suns no sedin dome ricuarts o rivocs dal passât, ma forme vive dal presint.

◆ La associazion e je stade fondade tal 2021 di un grup di professioniscj che a vegnin dal mont de culture, comunicazion e organizazion di events culturâi. Tal progjet o cjatin Leo Virgili, animadôr e diretôr artistic, Francesca Mione, che si ocupe di logjistiche e furniments, Paolo Cantarutti e Claudia Ferigo pe comunicazion, Stefano Bragagnolo

pe part tecniche. Duncje e je une rêt di colaboradôrs che a metin in jessi ideis, contats e formâts. Par Inniò la culture no je un ogjet di vetrine: e je une energjie che si vîf, si compuarte e si plasme su la fonde dai lûcs e dai lôr ambients.

◆ Cence volê slontanâsi des nestris lidris, Inniò è metût in vore progjets che no son stâts events tradizionâi, o festivaî tal lôr mût standard, ma veris esperiencis. Une di chestis e je stade Natisa, un cjamin musicâl dilunc de setemane dal 1 ai 7 di Setembar dal 2025, che al à cjatât musiciscj e comunitâts a mieç dal flum Nadison, trasformant il percors e i borcs in palcs improvisâts. Cu la armoniche di Paolo Forte e altris musiciscj e poetis, chest viaç artistic al à dât forme a une musiche che si sint come une conversazion tra lenghis, paisaços e popui.

◆ Al centri di Natisa e pulse une passion animade di personis che a àn tal cûr la idee di culture come comunitât, condivison e apartignince. I musiciscj si incrosin cussî intun gredei artistic che al lee teritori e vòs, realtât e imagjinazion. Cun lôr la armoniche no sune dome melodiis, ma e puarte dentri di se il rivoc di memoriis, lidris e respirs profonts.

◆ Simpri cul progjet, l'an passât a son stâts organizâts diviers events. Ognidun al è un moment par stâ insiem, scoltâ, rifleti e sintî la lenghe e i suns de nestre tiere cjapâ vòs. Come par esempli la serade tal Ex Cine di Padier a Udin, là che musiche "furlane e cjargnele" si son

metudis dongje: a Dicembar il doi Bumbuie (cun Paolo Forte e Leo Virgili) al à puartât suns che a rivin de tradizion, mariproponûts intune clâf moderne, e chest ultin Zenâr, te suaze de celebrazion Unvier, Trival (Alvise Nodale, Veronica Urban e Luca Boschetti) e altris musicants a àn regalât una serade di notis furlanis di plene riflission.

◆ Ma Inniò nol avredome cundatis, programs e pubblicitât: e lavore cun personis, comunitâts, musicants e musiciscj, voluntaris, amants di lenghe e de lôr storie. Chest al è il so motôr: une cumbinazion di passion, identitât e voie di metisi in zûc. E chest al è il messaç che i rive al public: la culture si sosten cu la partecipazion, cu la condivison e cu la presince.

◆ Inniò no je dome une idee culturâl, ma une lenghe, una tiere, una maniere di stâ insiem. Si puedin cjatâ dutis lis informacions e i inzornaments sui progjets, anunziis di colaborazions, fotografiis e videos dai events lant sul sît uficiâl www.associazioneinno.eu, su la pagjine Facebook "Associazione Inniò" e sul profil Instagram "innioudin".

◆ Inniò nus mostre che la furlanetât no je une robe di museu, ma una presince che si pues meti in moviment. Une presince che si esprim cun lenghe, musiche, storiis che a vegnin dai monts e de citât, cun cjançons che a restaran tal timp.

◆ Ce che nus invade a fâ Inniò al è vignî, sintî, jessi vòs di chest flum di culture che no si impoche. ■

I LIBRIS SIMPRI BOGNS

Gianluca Franco, *Une storie sole, Pasian di Prât, 2022*

Laurin Zuan Nardin



"Salacor la strade e à di jessi un tic di rive jù. Parcè che rivant par di ca, i balotuts pidâts a van plui lontan che di chêt altre bande. Al è un zûc che Lucio al fâs simpri: cirî di ripâ i balonuts fin dentri de bocje dal tombin. Tîr di punizion. La bariere sistemade e invisibile. Il zuiadôr cu la maie a riis e il numar blanc su la schene al cjape la smire. Al è concentrât. Nol pues falâ".

◆ Par capî che e je pardabon une storie sole, i vûl rivât insom des scuasi cent e cincuant pagjinis di chest libri, premi S. Simon dal 2022. Chest par vie che i personaços a son tancj e, leint, si à la impression di une schirie di contis ognidune par so cont. Il prin personaç al è Lucio che al scemence a no stâ ben, propit nuie ben: al sarâ lui chel che al sierarâ il libri tornant a meti adun dutis lis tramis. Daspò o cjatin Robert, un frut indotât di une inteligence fûr dal normâl e, par chel, disadatât e cjolt vie dai compagns; Laurinç il miedi che al à un bon ce fâ cuntune zovine in riviel cuntri dal mont; Mario che al mande in fas il so matrimoni e al piert ancje la amante; Lavinie che un riflès di una pierute dal mosaic che e je daûr lavorâ i puarte inte memorie une brute esperience vude di zovine; Federiche ancje jê vittime di violence; Fulvio il sfigât che dome inte musiche al cjate une reson di vivi; Indri e Mateu, doi impleâts che a zuin di scacs; Lino che al piert la viste ma che al torne a cjatâ Bice, la sô femine; Fabio che al à inventât lis scarpis plui brutis dal mont ma che duj a vuelin comprâlis; Gino Lavandin, idraulic di bon cûr e sô fie Elene che e va a finîle su la brute strade de prostituzion. Interessante la figure di Patrizie che e à vude une storie brute, un matrimoni falît propit in chel che al veve di scemencâ e une mari stufadice e invadente. E fâs la stampadore e no i sparagne cualchi critiche al autôr dal libri che e je daûr a impagjinâ. Cuâl libri? Propit *Une storie sole*, cjale il câs! Inte architeture complesse e une vore ben structurade dal romanç, una pocje di autoironie no sta mâl.

◆ Che al sedi stât scrit in tims di Covid, si lu capis ben intal cjapitul plui incuietant, il dodis. Come se no fossin avonde il patî, il dolôr, la tristerie, lis delusions, la violence, velu un altri pericol catastrofic.

◆ Ma no dut al è brut in chest mont: i compagns di scuele di Lucio a son una lûs vivarose di sperance. ■

SPORT... CHE TI TRAI!

Il Torneu dai Cjanâi Cjargnei dal 1976: cuant che si zuiave cu la pôre dal orcolat

Daspò dal diviêt dal comissari Zamberletti, invezit dal campionât al è stât pensât un mût di zuiâ dome cui paîs plui dongje

servizis di Francesco Tonizzo

Comincia bene il torneo delle vallate

Prime classifiche nei cinque gironi

Girone A		Girone C	
IRISULTATI		IRISULTATI	
Ampezzo*Udina	4-2	Palazzo*Trilî	3-0
Edera*Andas	1-0	Arta*Velox	1-0
Folgor-Villa	1-1	Real*Castivato	1-0
Fornese-Rapid	0-0	Mobilîrs*Marmit	2-0

LA CLASSIFICA		LA CLASSIFICA	
Edera	1 0 0 1 0 2	Palazzo	1 1 0 0 1 0 2
Ampezzo	1 1 0 0 4 2	Real	1 1 0 0 2 0 2
Villa	1 0 1 0 1 1	Arta	1 0 0 0 1 0 2
Folgor	1 0 1 0 1 1	Nobis	1 0 0 1 1 1 1
Fornese	1 0 1 0 0 0 1	Arta	1 0 0 1 1 1 1
Rapid	1 0 1 0 0 0 1	Castivato	1 0 0 1 0 1 0
Udina	1 0 0 1 2 4 0	Marmit	1 0 0 1 0 2 0
Andas	1 0 0 1 0 1 0	Trilî	1 0 0 1 0 3 0

PROSSIMO TURNO		PROSSIMO TURNO	
Andas - La Delizia, Villa - Edera, Rapid - Folgor, Ampezzo - Fornese.		Velox - Palazzo, Castivato - Arta, Marmit - Real, Mobilîrs - Trilî.	

Girone B		Girone D	
IRISULTATI		IRISULTATI	
Ovazza-Amora	2-0	Wesent*Malborgh	4-1
Cedarcj*Revasclet	1-0	Magno-Pontebane	2-0
Arta-Rigolât	3-2	Tarvis*Chiuson	5-1
Sapade*Compians	2-0	Ho riponato il Val Resia	

Cortiula, che par une vore di agns al à fat il president dal mandament cjargnel de FIGC, insieme cun Diego Meroi, storic president dal Comitât regjonâl dal balon, a à pensât di meti adun il Torneu dai Cjanâi Cjargnei".

Parcè propit un torneu spartit par cjanâi?

"Parcè che la necessitât e jere chê di no fâ cori sù e jù la int pes stradis. In Cjargne la situazion e

garantive ancjemò la pussibilitât di movisi di un paîs a chel plui dongje. I cjanâi a davin chest jutori, par cuistions gjeografichis e di trafic i dirigjents a à decidût di butâ jù une liste di cinc zions. Intal ziron A a zuiavin Dimpeç, Audax, Edera, Folgor, Fornese, La Delizia, Rapid e Vile, intal Cjanâl di Soclêf. Intal ziron B a zuiavin Ancora, Ardita, Cedarcj, Comelians, Davâr, Ravasclet, Rigolât e Sapade, dutis scuadris

dal Cjanâl di Guart e Valcalde: achi la uniche ecezion al jere il Cedarcj. Intal ziron C, Darte, Çurçuvint, il Marmi di Timau, i Mobilîrs di Sudri, Paluce, Real Dimponç, il Trelli e la Velox par cjapâ dentri la conceje di Tumieç e un cjanton de Valcalde. Intal ziron D a jerin stadis metudis lis scuadris plui dongje dal teritori indulâ che il taramot si è sintût di plui: Schuse, Malborghet, Mueç, Pontebane, Tarvis, val

Resie, la Weissenfels di Fusine, tal Cjanâl dal Fier e te Valcanâl. In ultin, il ziron E, cu lis scuadris plui interessadis dal Orcolat: Bordan, Cjavaç, Dieç, Stele di Glemone, Trasaghis, Val del Lago e Verzegnis".

E cemût ise lade?

"La classifiche finâl dai cinc zions, daspò 14 zornadis in dut, e a viodût vinci il Dimpeç, cun 24 ponts, 52 goi fats e 12 cjapâts. Intal ziron B al à vinçût il Davâr, cun 23 ponts, 30 rêts e 14 cjapâts. Intal C, prins i Mobilîrs di Sudri, cun 22 ponts, cence mai pierdi, 28 rêts fats e 8 cjapadis. Intal ziron D, prin il Mueç, cun 18 ponts, 33 goi fats e 10 cjapâts. Infin, intal ziron E, al à vinçût il Cjavaç, cun 20 ponts, 27 rêts e 9 cjapâts".

Cui isal stât il "bomber"?

"Il miôr di ducj al è stât Geni Fachin dal Dimpeç, cun 17 goi. Daûr di lui Graziano Dell'Ins de Velox di Paulâr, Fiore Filafarro dai Mobilîrs di Sudri e Franco Mainardis dal Mueç, cun 12 rêts. Daspò si scuon nomenâ Sandro Clapiz de Edera di Denemonç, Rino Rainis dal Cedarcj, Renzo Casali de Ancore e Walter Picco dal Mueç, ducj cun 11 goi. A nivel gjenerâl, la squadre che e à segnât plui rêts e je stade il Dimpeç, cun 52 goi fats. La piês difese e je stade chê dal Schuse, cun 61 goi cjapâts. E il Trelli di Paulâr e je stade la squadre plui batude, cun 12 partidis zuiadis cence mai vinci".

Ise vere che il torneu al à vude une gestion dai cartelins une vore pevarine?

"Come simpri. Resonant a ledrôs, mi plâs bati lis mans a Rapid, Mueç e Verzegnis che, cence mai cjapâ un cartelin, a à vinçude la Cope Dissipline". ■

RENATO DAMIANI: UN GRANT SPAC, MASSIME IN SETEMBAR

Il ricuart personâl dal gjornalist di Vile, la vôs plui preseade dal balon in Cjargne

Il ricuart personâl di Renato Damiani di chei dîs. "In chel timp, intal 1976, o vevi la gestion di une pizarie a Tumieç insieme cui miei cugnâts. Ai 6 di Mai, mi ricuardi une vore ben, al faseve cjaldon, robe di scjafioiâsi, si faseve fature a respirâ. La sale dal ambient e jere plene di int, no jerin puecj libars. Cuant che e je rivade la prime scosse, che o vin sintût ducj cetant ben, dutis lis personis che a jerin dentri il locâl a son ladis fûr di corse. Dut câs, i mûrs a àn tignût ben e nol è capitât nuie di pericolôs, almancul par nô. Si sin cjatâts ducj te strade vecje che e mene a Glemone e, crodimi, la strade e balave une vore. Robis di vè pôre".



Un ros víf. Plui indenant, fevelant cu la int che si cjavave a Glemone, a disevin ducj che a vevin viodût une fumate blancje: jo, stant a Tumieç, mi ricuardi un colôr ros. Un pinsîr che o ai ancjemò cumò. La mè preocupazion e jere che i clients, intal scjampâ fûr di pizarie, a vevin lassât dut su lis taulis. Bêçs,

Ce pinsîrs veviso plui di dut?

"Par nô, l'aspîet plui impuartant al jere là a viodi dai parincj, par jessi sigûrs che a fossin in salût. E rivâ a Vile di Tumieç nol è stât cuissà ce comut. Dut câs, cuant che mi soi inacuart che a stavin ducj ben, mi soi cuietât. Intal mès di Setembar, invezit, la scosse des cinc di matine le ai sintude une vore fuarte. In chei dîs o stavi a Tumieç e mi soi riparât sot dal jet pe pôre. Al jere impuartant no lâ fûr di cjase. Ai 15 di Setembar, la scosse des 11 di matine me ricuardi parcè che al jere un miercus e al jere zornade di polse dal locâl. Jo o jeri al par fâ i conts, come simpri. O soi scjampât fûr dal locâl, intal zardin daûr: timp di fâ cualchi metri e il fumarûl al è colât ju: a no plui di 50 centimetri dal gno cjâf. O ai cjapât sù dut, famee e robis, e o soi scjampât a Mestre, dongje Vignesie, indulâ che a jerin i miei parincj".

Cinquante agns daspò, ce pensistu?

"L'Orcolat al è stât une esperience di no crodi, impussibil di dismenteâ. Ancje cumò, se si sint une scosse piçule, il pinsîr al va al 1976 e la sgrisule e je simpri tante". ■

CAMPIONÂT DI BALON CJARGNEL 2026: SI TACHE IN AVRIL

La finâl de Super Cope Cjargne e je il prin apontament. Daspò si scomençarà il torneu principâl



La stagjon dal balon in Cjargne e tache ai 18 di Avril cu la finâl di SuperCope. IntalstadidiDamâr, une cuintri chê altre, Cjavaç e Cedarcj si zuin il trofeu. Daspò di chest apontament, al tache il campionât: 38 scuadris, trê categoriis, cetante passion par une competizion che e je une vore particolâr. Il campionât cjargnel al è l'unic torneu che si zuiave pe Istât, afiliât ae Federazion taliane dal Balon. ■

Sensazioni?

"Cjalant viers la Basse, bande Glemone, o viodevin il cil colôr ros.

**Par viodi chei altris contignûts
de “La Patrie dal Friûl”,**

abonaitsi. Dutis lis informazions si cjatin sul sît
www.lapatriedalfriul.org



**Per vedere gli altri contenuti
de “La Patrie dal Friûl”,**

abbonatevi. Tutte le informazioni si trovano sul sito
www.lapatriedalfriul.org

Che tu sedis za abonât o che tu le vedis lete dome cualchi volte,
aboniti o rinove l'abonament a un mensîl unic:

almancul une volte al mês, lei par furlan!

